

塞外紀程

陳法傳

陳法貴州安平人康熙五十二年進士改翰林院庶吉士散館授檢討五十六年充順天府鄉試同考官五十九年充會試同考官雍正初特旨舉翰林才堪部務者改刑部郎中八年授直隸順德府知府所屬平鄉牛產子一角龍鱗而牛蹄知縣以爲麟將上之法抑不許尋引疾歸高宗登極以孫嘉淦薦授山東登州府知府擢運河道調江南廬鳳道復調淮陽道法考論河務著河干問答謂河濟爲北紀江淮爲南紀不可易置今河淮

塞外紀程傳

一 黔南叢書

二瀆交流爲害直導河自張秋以東入大清河循濟潔之故瀆以入於海嘉淦見其書善之乾隆十年調直隸大名道是歲河決江南陳家浦河督白鍾山被劾去責令賠補法念舊於鍾山同事不可使獨受譴牒部科自引咎且爲鍾山辯析奉旨下部議革職發軍台効力法以四駱駝負書數萬卷赴第十六台日著書自娛台舊無井法示其地掘之得泉而甘人號陳公井以子慶升呈懇爲父贖罪得旨放歸法居官爲政以教養爲先興利除弊力挽頽風公牘文告皆手治情詞懇欵既久人

猶感誦之生平潛心性理尤服膺朱子之學其伯父嘗棄諸生入深山中求道靜坐月餘云忽見此心光明洞澈與天地萬物爲一體法疑之後以憂歸里於山寺中徧觀楞嚴圓覺法華諸經乃知象山陽明之說實類禪宗因著明辨錄以闢其非謂象山心學即釋氏直指人心以頓悟爲道妙本集中於楊慈湖有雙明閣之悟於詹子南有下樓之悟於徐仲誠有槐堂鏡中觀花之悟此即廖子晦靜坐中見所謂充周而洞達者萬物在其中各各呈露朱子斥之以爲此思慮泯絕恍惚間瞥見

塞外紀程傳

一一 黔南叢書

心性影象與聖賢真實知見不同者也陽明在龍場端居默坐一夕大悟汗出踴躍若狂即錢緒山蔣道林羅念庵凡學墮於禪者無不有此頓悟之機與子晦所見無二子晦得朱子就正乃悟所見之非象山獨學無師而於孟子所謂本心所謂求放心者有契合焉然其言求放心則遺學問言先立乎其大則廢思俱未暇深求其義而於其本心之明或靜中體究或因事感觸此知覺之知恍惚呈露蓋不難矣遂於此而謂此心本靈此理本明云收拾精神自作主宰當惻隱即惻隱當羞惡

即羞惡誰能欺得是此心已全乎仁義禮智發之無不當大舜之由仁義行更何俟四端之擴充豈孟子教人之旨乎夫聖賢所謂復其本心者復其皆備之心象山所謂復其本心者復其虛靈知覺之心則一心外無餘事故詆格致爲支離視集義爲外義本原既差功效自不能不異而儒釋遂以此分矣又謂良知之說本之孟子惟孟子本愛敬而言陽明離愛敬而言是假良知之名以文其靈覺之知也陽明旣曰良知即理又曰良知所知之天理是已歧而二之矣旣曰良知即性又曰佛

氏本來面目即儒門所謂良知佛氏本來面目果性耶天理耶其所謂致者一若不假推致之力純任自然無往非道孔子生安猶至七十而始不逾矩今欲人人不學不慮坐致於此其不致猖狂妄行者幾希此任心廢學之弊也其論格致謂程子以格訓至如祖考來格之格即書所謂格于上下之格羅整庵引呂成公通徹無間之義極爲得之夫子孫之精神即祖考之精神當其未格不能無幽明之異格則精神訢合而無間矣物之理即吾心之理當其未格不能無彼此之間格則理皆

渾合而無間矣而陽明以爲至物不可通此泥於訓詁之失也書凡十篇辨論至明哲居軍台時著易箋八卷取程朱傳義發明之大旨以人爲主而深闢來知錯綜之說桂林陳宏謀與法最契迎居蘇撫署中嘗應詔舉賢再疎薦法法無意仕進歸主貴山書院十有八年而卒又著有內心齋稿

見國史
儒林傳

塞外紀程

傳

四

黔

南

叢

書

塞外紀程序

塞外紀程者安平陳定齋先生謫戍軍台往還紀程之所作也當乾隆十一年丙寅春河工濱海穿防原不爲患河督白鍾山爲御史糾彈繫獄且令賠補先生聞之念舊與鍾山共事不宜獨令受禍因自引咎且辯其罔牒部科略曰陳家浦堤漫溢之時各處船隻分往水至之處接濟人民未據報有淹斃人口今查勘濟渡不及致斃者自屬應有難云未損一人是本道亦失查察若止將總河議處本道以調任幸免雖吏議可逃而清夜

塞外紀程序

難安伏乞一併議處至善後案內遙越堤工經大學士等議覆應行修築奉旨依議遵照辦理今勘尾堤離圍堤六百丈係無益之費着落白鍾山賠補本道查黃河水勢倏忽變遷此工在雲梯關五十里雲梯關即當日之淮河海口黃河南徙淤出二百餘里上雖淤土底則海沙虛鬆頃刻刷深四五丈椿埽難施居民鮮少人夫難集或水勢過大倉卒搶築之越堤難資捍禦不能無潰決之虞是遙堤之築實爲有備無患若河工陰資保障而錢糧獨累賠補似非情理之平河工不過補偏救

敝原無萬全之策總河職任危苦養廉不及督撫之半
偶有意外之虞議處之罷斥之足矣重之以賠累則任
事者愈難人非貪黷誰有餘財非聖世所以勵臣節也
部臣以聞卒謫軍台乃於丁卯年十二月十三日從容
就道以四駱駝載書自隨到台後築土屋以居日事著
書慨然有終焉之志越明年以子慶升乞贖得請始環
往還台站所經皆有紀述即斯編也先生以真品實學
爲清代有數名儒生平著作皆經梓行易箋一種四庫
全書且搜採及之惟此編未刻原稿尙存先生故里白

塞外紀程序

一一 黔南叢書

雲山莊百八十年來歷劫不磨彌足矜異亦以見子孫
護持之賢矣余旣跡而得之念爲先生大節所系雖字
墨無多其可珍視有在乎尋常文字之外者因付劂劂
以廣流傳而資興感蓋其謀國之忠待人之恕赴義之
勇律已之嚴胥於此行見之滔滔茲世安得尙有斯人
哉觀其落落莫莫衝寒投荒曾無幾微見於顏面富貴
利達得失榮辱皆能度外置之以視范文正所謂如四
時寒暑之過乎吾前者寧多讓焉

民國二十二年三月貴陽後學凌惕安謹序

塞外紀程

安平陳 法定齋著

乾隆十二年丁卯十二月十三日出都三十里宿清河
十四日四十里至昌平州即僱肩輿而行二十五里至
南口

十五日十二里至居庸關三里至延慶衛七里至上關
八里至扒搭嶺七里至岔道口由南口至岔道口路
在兩山中所謂官溝亂石填塞車行傾側聲若轟雷
征人苦之居庸關不甚高但有關名並無守兵延慶
衛城在山凹中不如扒搭嶺爲扼要由上關至岔道
口皆兩山夾峙一逕迤邐曲折穿通嚴兵守之雖百
萬衆不能過也懷宗信任中人使闖賊得踰安足惜
哉

十六日由岔道口至懷來縣

十七日二十里至土木驛五十里至保安州

十八日二十里雞鳴驛十里上河沿過黃河十里下河
沿十里响水鋪三十里宣化府

十九日三十里沙嶺三十里胡家屯皆砂路難行

二十日二十里夏家屯二十里舊懷安二十里新懷安
是日屢通洋河蓋是河曲折於兩山之中不止三折
如巴字也宣化一帶皆荒山地寒不種冬麥村落稀
少畏旱不畏潦洋河收衆山之水入桑乾河此永定
河之水所以驟漲也

二十一日三十里尤家店三十里宿天鎮縣是日過翟
兒嶺一帶山岡崎嶇難行

二十二日三十里至三十里鋪又三十里至陽和縣縣
臨邊途中見山嶺皆邊城西北一帶山橫亘縣城在

塞外紀程

二一 黔南叢書

山下又三十里住王官屯

二十三日至巨鹿鎮三十里又三十里雲西又三十里
宿大同府城外玉河之水自北而南入洋河會桑
乾係山水橋名興雲長約半里寬數丈兩端四鐵牛
石欄竟橋刻人物花卉極工巧石柱上獅子向背各
異態亦工於桑乾也城內喧瑣

二十四日四十里過洋河至雲岡一帶皆山路傍石壁
就鑿爲大佛覆以琉璃瓦壁間寺額者儼然見天竺
先生也又四十里宿高山堡就山爲堡故名

二十五日三十里雲西停車打轎一人前逡巡叩拜問
無恙詢之則舊日順德長隨劉美也今爲左雲縣丁
守驛於此敬致酒餅之餽人生何處不相逢信哉三
十里至左雲縣又二十里宿雲陽

二十六日四十里黃土坡又三十里朔平府右玉縣又
三十里宿殺虎口

二十七日辰刻出口三里佛爺溝又三十里壩底宿

二十八日十八里烏蘇土魯又三十里至二十家子街
市喧填滿兵五十副甲同知一員駐守煙戶約二百

塞外紀程

三二 黔南叢書

餘其名二十家者記其始也又三十里一間房宿

二十九日三十里哈拉烏蘇又二十里黑河又二十里
至歸化城歸化城在大青山下局市雄廠市井喧填
百貨皆集商賈輻輳地肥衍內地之民無田可耕者
視爲樂郊五穀柴煤炭皆賤於內地食物美有黃羊
山鹿雉兔黃河大魚是年魚賤十五文一斤耳

乾隆十三年戊辰正月初六日立春

十八日自歸化城行三十里宿焦贊墳此處有人戶然
不歇店即宿穹廬中

十九日五十里過吳公壩宿四爾登是日穿大青山而
過吳公壩即是山也高三四里下至山麓復行山夾
中數里迂回曲折出夾即小山連亘四爾登尙有開
舖人戶過此即無人矣

二十日四十里宿插拉厄蘇皆平山連亘

二十一日三十里宿烏子兔

二十二日宿白羊薄落計程七十里

二十三日宿可里七十里

二十四日二十里過貝勒河又行四十里宿巴棧

塞外紀程

四 黔 南 叢 書

二十五日三十五里宿西白課

二十六日四十五里宿場套

二十七日阻風未行

二十八日四十五里宿招索灘

二十九日六十里宿木歸圖

二月初一日五十五里至十四台

初二日五十里至十五台

初三日六十里至十六台

乾隆十四年八月十二日奉文回籍

十九日自十六台起程六十里至十五台宿

二十日五十里至十四台宿

二十一日四十里至十三台宿

二十二日五十五里至腰站宿地名阿石黑山舟

二十三日八里至十二台宿是日晤帥方伯贈以瀚海

石十餘枚

二十四日六十里至十一台自十一台至此途中皆小

石山路十一台之北十一里間偶有石似瀚海者但

欠光潤耳

塞外紀程

五 黔 南 叢 書

二十五日六十里至十台

二十六日六十里至九台是日晤程方伯至腰站又五

十里至八台

二十七日過沙拉樸梭河

二十八日五十里至腰站又六十里至七台是日晤海

南監司劉公諱庶素昧平生一見如故情意甚慇懃

也

二十九日六十里至腰站台北五里許多佳石甚於瀚

海中也

九月初一日六十里至六台

初二日四十里至腰站又五十里至五台

初三日四十里至腰站又六十里至四台是日晤沈太守留小灰鼠皮襖與之

初四日過札哈蘇台河三十五里至腰站又六十里至三台

初五日五十里至腰站又四十里至二台

初六日五十里至腰站又四十里至頭台是日晤周世兄

塞外紀程

六 黔 南 叢 書

初七日六十里至張家口

附詩

軍台土屋落成四首

投荒猶戴

主恩偏環堵居然受一廛絕域餘生霑覆載數椽
高枕靜烽煙遠山當戶還輸翠塞月窺簷也自圓
從此飄搖辭毳幕炎風朔雪總安眠

客至休嫌屋打頭拮据廣廈等綢繆材從雪窖枯
餘得土是龍堆劫後留豈有板升遺屬國何來蝸

角時蠻陬窮荒野處由來慣瀚海應驚見蜃樓
鳥言鞮鞞往來頻似說荒原氣象新蕭索正宜銘
陋室羶羶却笑卜芳鄰爰居已自歌陶復靡室何
勞憶遠人乳酒數杯遊太古始知懷葛有遺民
景物還跨大漠奇休將歛側諛支離風吹雞塞塵
爲幕雪壓天山玉作籬列炬門前飛夜檄品官庭
內肅威儀

台中張英百十庫筆
帖式遇歲節皆參謁

放衙却笑郵亭長

砂磧牛羊散曉曦

奉

塞外紀程

七 黔 南 叢 書

聖旨回籍題壁五首

丹詔飛來特賜環秋風好逐雁臣還不因倚里歸
心切未許平山風月間

出塞丁年同屬國還鄉兩載

主恩殊讓他遺像懸麟閣輸我萊衣拜慶圖

靜裏耽思河洛文彖爻妙義晚方聞多因憂患知
消息不爲他年識子雲

苦水標名瀚海隈靈泉指點幻仙迴千年記取陳

公井也當燕然勒石回

十六臺名木胡爾噶渣木
胡爾山形圓也噶渣苦水

也予初至飲之腹中作腸鳴不能下咽以爲從此殆矣一夜忽夢老人扶杖而行以杖召予至畫地作井字形既悟亟扶衣往視之沙中猶隱隱有字形遂以石志其地鑿之果得甘泉台人異之因名陳公井

到來已覺人情熟歸去翻憐惜別頻小大殷勤奉

杯酒再來真笑惠州人

東坡去惠州州人送之曰內翰何時再來

由台次入張家口五首

恩綸捧到日星爛解網

皇仁天地寬紫塞望雲魂已斷白頭倚闥淚初乾

首邱已畢殘年願裹革應慚報

塞外紀程

八 黔 南 叢 書

國難此去團圞扶阿母瓣香稽首五雲端

瀚海

恩波起涸鱗騰騰馬首出風塵一肩家具隨駝背

萬里秋風逐雁臣競說登仙誰得似便傳化鶴豈

無因可憐揮手河梁日處處離觴別故人

台中多舊識

鄉園翹首望天涯攬轡寧辭道路賒正及萱堂陳

柏酒還看荆樹發春華羶瘡漸覺離腸胃番語傳

來棘齒牙曾乞天孫機畔石

携翰海石十餘枚而歸

奚囊安

穩下星槎

千峰萬壑聳烟鬢遙指邊城絕嶺間三晉青山皆
繞塞二東斜日獨臨關谷通秦塹聲靈壯天入遙
峯紫氣環聖世享王周薄海晴雲飛鳥戍樓間自

六台至二台山皆不甚高自二台行七八十里有
大山橫亘名曰大壩上至山頂遙山千峰萬壑出
沒雲端即宣化大同一帶諸山也下至望麓即頭
台兩山夾送一水迤邐直通張家口邊城適當兩
山交處真天造地設也

邊城盡處是神州回首輕拋萬斛愁疲馬入關都
踴躍秋風拂面也和柔食耽旅飯霜蔬美路近春
明節使稠依舊中原風物好江山重展水雲眸

塞外紀程

跋

余束髮受書從世父靜川公學嘗爲言

十四世祖定齋先生任直隸大名兵備道時因陳家浦

河堤決口爲河督白公鍾山辯冤致有塞外之行紀程

之作楷聞而敬之以不得讀爲憾民國三年甲寅春兒

子祖銘肄業貴陽由蓉屏祖叔處得到塞外紀程一

冊浣誦再三見當日定祖於冰天雪地之中行荒漠

邊遠之地他人視爲難堪者吾祖獨處之泰然及到

十六台後飲食起居隨遇而安不嫌荒野不避羶羶觀

塞外紀程

跋

一〇 黔南叢書

象玩占箋註不懈一若無謫戍之事者愛國思親之忱

復時時流露於詩句間是誠中庸所謂素患難行乎患

難素夷狄行乎夷狄無入而不自得者殆無忝於古之

君子也今年春貴陽凌君惕安專函訪求因舉全稿

寄之夫富貴利達人情所羨窮困坎坷人世所畏吾

祖獨不愛爵祿不辭艱苦毅然違衆議發正論爲國家

建議爲良朋辯冤不因調任而萌倖免之心實有非尋

常所能及者凌君慨晚近士大夫之工於趨避巧於

彌縫爵祿之念重國家之念輕一任是非之顛倒不肯

直言如江河之日下也特將吾 祖塞外紀程捐資付
梓廣爲流傳以磨世而礪俗其維持世道人心之苦衷
昭然若揭楷自愧不能闡揚 祖烈而感 凌君之能
發潛德幽光也爰跋數語以歸之

民國二十二年二月紹書陳楷識於白雲山莊

塞外紀程

跋

一一

黔南叢書

